

Rebecca Evans AS/MS
Y Gweinidog Cyllid a Llywodraeth Leol
Minister for Finance and Local Government



Llywodraeth Cymru
Welsh Government

Mark Isherwood
Cadeirydd, Y Pwyllgor Cyfrifon Cyhoeddus a Gweinyddiaeth Gyhoeddus

Huw Irranca-Davies
Cadeirydd, Y Pwyllgor Deddfwriaeth, Cyfiawnder a'r Cyfansoddiad

1 Medi 2022

Annwyl Mark a Huw,

Diolch i chi am eich llythyr a'r cwestiynau a gyflwynwyd gan eich Pwyllgorau perthnasol ynghylch Memoranda Cydsyniad Deddfwriaethol y Bil Caffael. Mae'n bleser gennyf ddarparu fy ymateb, sydd ynghlwm yn Atodiad 1.

Edrychaf ymlaen at drafod y Memoranda Cydsyniad Deddfwriaethol yn y Pwyllgor Cyfrifon Cyhoeddus a Gweinyddiaeth Gyhoeddus ar 21 Medi.

Yn gywir,

Rebecca Evans AS/MS
Y Gweinidog Cyllid a Llywodraeth Leol
Minister for Finance and Local Government

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Correspondence.Rebecca.Evans@gov.wales
Gohebiaeth.Rebecca.Evans@llyw.cymru

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Atodiad 1

1. I ba raddau y gwnaeth Llywodraeth Cymru ystyried defnyddio'r amser y mae wedi'i nodi ar gyfer Bil Partneriaeth Gymdeithasol a Chaffael Cyhoeddus (Cymru) er mwyn cyflwyno Bil Caffael ehangach a fyddai yn cwmpasu Bil Caffael y DU yn ogystal â Bil Partneriaeth Gymdeithasol a Chaffael Cyhoeddus (Cymru)?

Roedd cryn dipyn o waith eisoes wedi'i wneud ar ddatblygu cwmpas, polisi, a chyfarwyddiadau cyfreithiol ar gyfer Bil Partneriaeth Gymdeithasol a Chaffael Cyhoeddus (Cymru) ("Bil SPPP") pan gafodd Gweinidogion Cymru yr opsiwn i ymuno â Bil Caffael Llywodraeth y DU, ac roedd y gwaith ymgynghori ar y Bil SPPP eisoes wedi'i wneud.

Byddai ymgorffori'r Bil Caffael o fewn y Bil SPPP yn golygu newid cwmpas y Bil SPPP, gan y byddai'n cael ei newid i fod yn Fil Caffael yn bennaf ac yn symud ei ffocws oddi wrth Bartneriaethau Cymdeithasol. Hefyd, mae'r ddau Fil yn anelu at gyflawni gwahanol bethau - mae'r Bil Caffael yn canolbwyntio ar y prosesau sy'n gosod y seiliau ar gyfer caffael, tra bo'r Bil SPPP yn canolbwyntio ar sicrhau bod ein gweithgareddau caffael yn arwain at ganlyniadau sy'n gymdeithasol gyfrifol.

Hefyd, byddai oedi sylweddol cyn y gellid gosod y Bil SPPP gerbron y Senedd, a hynny oherwydd proses ymgynghori ychwanegol. Byddai hynny wedi arwain at Lywodraeth Cymru'n gweithredu eu deddfwriaeth caffael yn hwyrach na Llywodraeth y DU, gan achosi:

- Dryswch, anghysondeb, ac ansicrwydd i awdurdodau contractio Cymru (WCAs) a chyflenwyr, yn enwedig y rhai sy'n cynnal eu busnes y ddwy ochr i'r ffin. Byddai hyn wedi cael effaith negyddol ar fusnesau bach a chanolig (BBaCh) sydd angen cysondeb er mwyn gwella eu gallu i optimeiddio effeithlonrwydd a lleihau costau.
- Marchnad Cymru'n dod yn anaddawol fel cyfle busnes os yw gweithdrefnau Cymreig yn wahanol i rai Lloegr. O ystyried bod gwariant y sector cyhoeddus yng Nghymru yn cynrychioli llai na 5% o gyfanswm y DU, mae'n hanfodol bod Cymru'n parhau i fod yn ddeniadol i gyflenwyr.
- Anfodlonrwydd a rhwystredigaeth ymhlith rhanddeiliaid y sector cyhoeddus yng Nghymru, sy'n awyddus i gael y sicrwydd a'r sefydlogrwydd a gynigir gan un drefn gaffael gyson.

2. Rydym wedi derbyn cyngor gan y Cwnsler Cyffredinol nad yw darparu adnoddau na chapasiti yn broblemau o ran cyflwyno Biliau Cymru. O ystyried y nifer sylweddol o ddarpariaethau mewn meysydd datganoledig sydd o fewn y Bil, a'r arbenigedd sydd ar gael i Lywodraeth Cymru ar faterion caffael, pam na roddwyd adnodd i ddatblygu Bil Caffael Llywodraeth Cymru ehangach?

Fel y nodwyd yn fy ymateb i gwestiwn un, roedd rhesymau ymarferol pwysig dros ymuno â Bil Caffael Llywodraeth y DU, gan gynnwys sicrhau cysondeb a sefydlogrwydd i'r prynwr a'r cyflenwr, ac i BBaCh Cymru yn enwedig.

Mae hyn hefyd yn gyson â'n hegwyddorion o ran argymell cydsyniad â Biliau'r DU, i'r graddau y mae natur ryng-gysylltiedig y systemau gweinyddol perthnasol yng Nghymru a Lloegr yn ei gwneud yn fwy effeithiol a phriodol i symud darpariaethau'r ddwy system ar yr un pryd a chan ddefnyddio'r un offeryn deddfwriaethol.

3. O ystyried fod hwn yn faes polisi cyhoeddus hynod bwysig, a yw'n briodol i ddefnyddio dull deddfwriaethol sy'n atal Aelodau etholedig y Senedd rhag gwneud gwaith craffu deddfwriaethol manwl ar bwnc y Bil, gan gynnwys ymgysylltu â rhanddeiliaid Cymru?

Ar ôl i Lywodraeth y DU gyhoeddi eu Papur Gwyrdd *Transforming Public Procurement*, cynhaliodd Llywodraeth Cymru gyfres o ddigwyddiadau ymgysylltu â rhanddeiliaid, a nodwyd bod rhanddeiliaid yng Nghymru ar y cyfan yn fodlon â chynigion y Papur Gwyrdd. Mae rhagor o waith ymgysylltu â rhanddeiliaid wedi'i wneud ar ystod o feysydd penodol sy'n gysylltiedig â Bil, gan gynnwys cynigion mewn perthynas â thryloywder o ran caffael is na'r trothwy a Datganiad Polisi Caffael Cymru.

Bydd y broses cydsyniad deddfwriaethol yn sicrhau bod modd i'r Senedd wneud gwaith craffu, gan helpu i sicrhau bod Llywodraeth y DU yn glynu wrth yr addewidion a wnaethant pan gytunom i gynnwys awdurdodau contractio Cymru yn y Bil. At hynny, bydd sylwedd deddfiad y Bil yn cael ei nodi mewn deddfwriaeth a chanllawiau eilaidd dwyieithog sydd i'w datblygu gan Lywodraeth Cymru wrth i'r Bil barhau â'i daith ddeddfwriaethol. Mae gan Weinidogion Cymru bwerau cyfatebol mewn meysydd sylweddol o'r Bil, felly bydd lefel sylweddol o ddeddfwriaeth eilaidd a fydd yn destun craffu deddfwriaethol manwl yn y Senedd, a bydd gwaith ymgysylltu ac ymgynghori ehangach yn cael ei wneud â rhanddeiliaid ledled Cymru.

4. Pa mor hygyrch fydd y drefn gaffael newydd ac yntau wedi'i rannu dros ddau Fil?

Mae pwrpas y ddau Fil yn wahanol. Mae'r Bil Caffael yn canolbwyntio ar y prosesau sy'n gosod y sylfeini ar gyfer caffael, tra bo Bil Partneriaeth Gymdeithasol a Chaffael Cyhoeddus (Cymru) yn anelu i sicrhau bod ein gweithgareddau caffael yn arwain at ganlyniadau sy'n gymdeithasol gyfrifol. Bydd y drefn gaffael newydd yn hygyrch i gyflenwyr gan y bydd tendrau yn cael eu cynllunio i ateb gofynion y ddau Fil pan fydd angen. Dylai'r mesurau tryloywder gwell hefyd sicrhau bod cyfleoedd tendro, data caffael, ac ati, yn fwy gweladwy i gyflenwyr o gymharu â hyn o bryd.

5. I ba raddau yr ydych chi a'ch swyddogion yn rhan o'r gwaith o lunio a drafftio cymalau Bil Caffael y DU? A oeddech chi fel Gweinidog yn ei gwneud yn ofynnol i bob cymal gael cymeradwyaeth unigol?

Bu fy swyddogion yn cydweithio'n agos gyda'u cymheiriaid yn Swyddfa'r Cabinet ar ddatblygu'r Bil Caffael, ac maent yn parhau i wneud hynny er mwyn sicrhau ei fod yn cyd-fynd ag amcanion a deddfwriaeth polisi Cymru. Maen nhw'n cwrdd yn aml a byddant yn parhau i archwilio unrhyw ddiwygiadau ychwanegol y mae'r Llywodraeth yn eu gwneud i gymalau'r Bil wrth iddo symud drwy system graffu Senedd y DU.

Rwyf wedi dwyn sylw at feysydd lle nad oedd cymalau arfaethedig y Bil yn cyd-fynd ag amcanion polisi Cymru. O ganlyniad, mae darpariaeth wahanol wedi ei chynnwys yn y Bil ar gyfer awdurdodau contractio yng Nghymru er mwyn adlewyrchu'r amcanion polisi penodol hynny.

6. Pa ymgynghoriadau a gynhaliwyd gyda rhanddeiliaid Cymru i lywio'r broses ddrafftio?

Cyhoeddodd Swyddfa Cabinet y DU eu Papur Gwyrdd '*Transforming Public Procurement*' ym mis Rhagfyr 2020. Yn ystod cyfnod ymgynghori'r Papur Gwyrdd, cynhaliodd Llywodraeth Cymru gyfres o ddigwyddiadau ymgysylltu â rhanddeiliaid i geisio eu barn ar sut y gellid diwygio deddfwriaeth gaffael er budd Cymru, ac i fesur eu hawch am y cynigion yn y Papur Gwyrdd.

Roedd hyn yn cynnwys sesiynau ymgysylltu wedi'u targedu gyda sector preifat Cymru, gan gynnwys Diwydiant Cymru, y diwydiant adeiladu, a chwmnïau cyfreithiol, er mwyn deall effaith cynigion y Papur Gwyrdd ar fusnesau Cymru.

Dilynwyd y sesiynau hyn â rhanddeiliaid gydag arolwg lle dywedodd y mwyafrif o rhanddeiliaid Cymru eu bod yn fodlon ar gyfeiriad y diwygiadau a gynigiwyd ym Mhapur Gwyrdd Llywodraeth y DU.

7. Beth oedd rôl y fframwaith cyffredin dros dro ar gyfer caffael cyhoeddus wrth ddatblygu'r Bil?

Mae Gweithgor eisoes wedi'i sefydlu o dan y fframwaith cyffredin dros dro ar gyfer caffael cyhoeddus. Cynhelir cyfarfodydd misol ac mae'r pedair Gweinyddiaeth yn mynychu ac mae datblygiad y Bil yn eitem sefydlog ar yr agenda.

8. Mae Llywodraeth y DU o'r farn bod cymalau 114 ac 116 angen cydsyniad y Senedd. Allech chi amlinellu sut y gwnaethoch ddod i'r casgliad nad oes angen cydsyniad y Senedd ar gymalau 114 ac 116?

Mae cymalau 114 a 116 yn ddarpariaethau technegol sy'n ymwneud â sut mae'r Bil yn gweithio yn hytrach na darpariaethau o sylwedd, ac fel mater o arfer nid ydym yn tueddu i gynnwys cymalau anweithredol o fewn Memoranda Cydsyniad Deddfwriaethol.

9. Mae cymalau 50, 62, 63, 65, 79 a 80 yn cynnwys pwerau Harri'r Wythfed i Weinidogion Cymru, yn amodol ar y weithdrefn negyddol. Beth oedd eich rôl chi

wrth ddewis y gweithdrefnau hyn ac a ydych chi'n credu bod y weithdrefn negyddol yn briodol ar gyfer y pwerau hyn?

Mae fy swyddogion wedi ystyried y pwerau a'r gweithdrefnau cysylltiedig fel rhan o'u hadolygiad o'r cymalau drafft a ddarperir gan Lywodraeth y DU ac maent wedi darparu adborth fel y bo'n briodol. Mae rhai pryderon o ran gweithdrefnau rhai o'r cymalau hyn wedi'u codi yn Adroddiad y Pwyllgor Pwerau Dirprwyedig a Diwygio Rheoleiddio.

Mae'r trafodaethau rhwng fy swyddogion a'u cymheiriaid yn Swyddfa'r Cabinet yn parhau mewn perthynas â'r ymateb i'r Pwyllgor Pwerau Dirprwyedig a Diwygio Rheoleiddio.

10. A allwch chi ddarparu naratif ar y pwerau cydredol o fewn y Mesur a sut mae'r dull a fabwysiadwyd gan Lywodraeth Cymru yn cydymffurfio â'i chanllawiau ar y mater hwn?

Mae Gweinidogion Cymru wedi sicrhau pwerau cyfatebol ac annibynnol er mwyn gwneud rheoliadau ar gyfer mwyafrif helaeth o bwerau yn y Bil.

Mae yna bŵer cydredol plws yn y Bil, fel y'i cyflwynwyd, mewn perthynas ag adran 62 (anfonebu electronig). Cytunodd y Cwnsler Cyffredinol a minnau fod rhesymeg gref dros y sefyllfa hon. Ystyriwyd bod pŵer cydredol plws yn briodol, yn bennaf er mwyn darparu cysondeb i'r safonau a'r cystrawennau e-anfonebu sylfaenol ar draws gwledydd y DU, a hynny er mwyn osgoi dryswch a chostau ychwanegol i gyflenwyr. Yn unol â'r canllawiau, mae fy swyddogion wedi sicrhau bod cymhwysedd gweithredol a deddfwriaethol y Senedd wedi'i ddiogelu gan fod hwn yn bŵer cydredol plws ac mae eithriad (*carve-out*) wedi'i gynnwys o fewn adran 106 o'r Bil.

Mae'r pwerau eraill o fewn y Bil sydd, ar hyn o bryd, wedi'u rhestru fel rhai cydredol yn destun trafodaethau parhaus gyda Llywodraeth y DU, fel y nodir ym mharagraff 119 o'r Memorandwm Cydsyniad Deddfwriaethol.

Mae'r Bil yn dal i fynd drwy'r broses ddeddfwriaethol ac mae'n bosib y bydd pwerau cydredol pellach o ganlyniad i ddiwygiadau posib. Mae fy swyddogion yn monitro diwygiadau posib a'u heffaith ar Gymru.

11. Pa waith dadansoddi ydych chi wedi'i wneud o ran sut mae pob cymal o'r Bil yn gwahaniaethu oddi wrth y sefyllfa ddeddfwriaethol bresennol neu yn ei efelychu, ac a all y Pwyllgorau weld y dadansoddiad hwn?

Mae gwahaniaethau sylweddol yn y dull gweithredu rhwng y cymalau o fewn y Bil a gynigir a'r sefyllfa ddeddfwriaethol bresennol. Er enghraifft, mae'n cyfuno agweddau ar Reoliadau Contractau Cyhoeddus 2015 (PCR), Rheoliadau Contractau Cyfleustodau 2016 (UCR), Rheoliadau Contractau Consesiwn 2016 (CCR) a Rheoliadau Contractau Cyhoeddus Amddiffyn a Diogelwch 2011 (DSPCR) oll o fewn un darn o ddeddfwriaeth. O'r herwydd,

nid yw'n briodol i swyddogion gynnal dadansoddiad cymal wrth gymal o'r Bil er mwyn ei gymharu â'r rheoliadau presennol.

O ganlyniad, mae fy swyddogion wedi defnyddio dull cyfannol wrth adolygu'r Bil, gan adolygu cymalau penodol yn erbyn y ddeddfwriaeth bresennol dim ond pan fo hynny'n briodol.

12. A ydych chi wedi cynnal asesiad o effeithiau penodol y Bil fel y'i cyflwynwyd ar Gymru?

Gan fod hwn yn un o Fesurau Llywodraeth y DU, nid oes gofyniad i Lywodraeth Cymru gynnal asesiad o'r effeithiau penodol i Gymru. Yn hytrach, cyfrifoldeb adran arweiniol Llywodraeth y DU (yn yr achos hwn, Swyddfa'r Cabinet) yw cynnal asesiad effaith ac ystyried y costau a'r buddion cymharol sy'n gysylltiedig â'r newidiadau deddfwriaethol arfaethedig ac os byddai unrhyw effeithiau ychwanegol ar Gymru. Gellir gweld yr asesiad effaith ar wefan Senedd y DU (<https://bills.parliament.uk/bills/3159/publications>).

Mae fy swyddogion wedi adolygu'r asesiadau effaith perthnasol a wnaed gan Lywodraeth y DU ar y Bil fel y'i cyflwynwyd, ac rwy'n fodlon nad oes unrhyw faterion niweidiol wedi eu nodi o safbwynt polisi Cymru. Mae fy swyddogion yn parhau i weithio'n agos gyda swyddfa'r Cabinet ar ddatblygu'r Bil, a byddent yn ystyried effaith unrhyw ddiwygiadau a wneir ar Gymru yn ogystal â mynd i'r afael ag unrhyw faterion sy'n gysylltiedig â'r Bil fel y nodwyd yn y Cynnig Cydsyniad Deddfwriaethol.

Bydd asesiadau effaith yn cael eu cynnal ar y ddeddfwriaeth eilaidd a fydd yn cael ei ddatblygu gan Lywodraeth Cymru, a byddent ar gael wrth iddynt gael eu creu.

13. Mae'r Memorandwm yn nodi "Mae'n debygol y bydd nifer o gostau ynghlwm â diwygio caffael cyhoeddus yng Nghymru er bod yr union fanylion i'w cadarnhau o hyd". A allwch chi ymrwmo i rannu manylion y costau hyn gyda'r Pwyllgorau ar ôl iddynt gael eu cadarnhau?

Gallaf. Rwy'n ymrwmo i rannu manylion y costau hyn pan fyddant wedi'u cadarnhau.

14. A allech chi roi diweddariad o ran y trafodaethau â Llywodraeth y DU ar y diwygiadau sy'n cael eu cyflwyno i'r Bil er mwyn mynd i'r afael â'r pryderon a nodwyd gennych ym mharagraff 119 y Memorandwm?

Mae'r trafodaethau â Llywodraeth y DU yn parhau ynghylch y pryderon a nodwyd ym mharagraff 119 o'r Memorandwm.

Rydym wedi cyrraedd sefyllfa lle'r ydym oll yn gytûn ynglŷn â'r materion sy'n ymwneud â'r "pŵer datgymhwyso ar gyfer gwasanaethau gofal iechyd". Nid yw'r pŵer hwn wedi ei gynnwys yn y Bil ac mae opsiynau'n cael eu hystyried er mwyn ei ddatblygu drwy ddeddfwriaeth y Senedd.

Mae'r pryder ynghylch dyletswydd Awdurdod Contractio Cymru i sicrhau bod Datganiad Polisi Caffael Cymru yn un y gellir ei "orfodi mewn achosion sifil" hefyd yn cael sylw, ac mae diwygiad gan y Llywodraeth yn cael ei gynnig yn y cam Pwyllgor Arglwyddi er mwyn mynd i'r afael â hyn.

Mae swyddogion yn parhau i weithio gyda'u cymheiriaid yn Llywodraeth y DU ar weddill y pryderon a restrir ym mharagraff 119. Cefais lythyr hefyd gan y Gweinidog Rees-Mogg ar 12 Awst a oedd yn dweud ei fod wedi nodi fy mhryderon ac wedi gofyn i'w swyddogion barhau i weithio ar y cyd â fy rhai i drwy gydol yr haf a mis Medi, a hynny er mwyn datrys y pryderon sy'n weddill tra bo'r Bil yn mynd drwy'r broses seneddol. Felly, byddwn yn parhau i geisio datrysiadau i'r materion sy'n weddill a byddwn yn rhoi adborth i'r pwyllgorau wrth i gynnydd pellach gael ei wneud.

15. A ydych chi wedi defnyddio'r trefniadau cysylltiadau rhynglywodraethol newydd i ddatrys materion sy'n peri pryder?

Na, nid ydym wedi defnyddio'r trefniadau cysylltiadau rhynglywodraethol newydd. Mae unrhyw faterion sy'n peri pryder wedi cael eu trin, ac yn parhau i gael eu trin, drwy ohebiaeth a chyfarfodydd rhwng swyddogion a/neu Weinidogion.

16. A fyddwch yn cyflwyno eich deddfwriaeth eich hun i ymdrin ag unrhyw faterion sy'n peri pryder na allwch eu datrys?

O ystyried beth yw'r materion sy'n peri pryder, ni fyddai'n bosib cyflwyno ein deddfwriaeth ein hunain i'w datrys. Er enghraifft, mae angen ymdrin â'r mater ynghylch y diffiniad o awdurdodau datganoledig Cymru yn y Bil Caffael ei hun oherwydd, p'un a oedd Cymru'n rhan o'r Bil hwn ai peidio, byddai angen diffiniad effeithiol y mae pawb yn cytuno arno er mwyn sicrhau eglurder o ran pa ochr o'r llinell y byddai awdurdod contractio yn glanio.

17. A fyddwch yn ymrwmo i beidio â defnyddio cytundeb rhynglywodraethol gyda Llywodraeth y DU fel mecanwaith i ddatrys eich pryderon?

Byddaf yn ymrwmo i beidio â defnyddio cytundeb rhynglywodraethol gyda Llywodraeth y DU fel mecanwaith i ddatrys ein pryderon. Fodd bynnag, byddaf yn adolygu hyn wrth i drafodaethau barhau ac wrth i'r Bil barhau ar ei daith.

18. Pa rôl fydd gennych chi a'ch swyddogion yn ystod y broses graffu a diwygio yn San Steffan?

Mae Llywodraeth Cymru eisoes wedi cynnig sawl diwygiad sydd wedi'u cynnwys gyda diwygiadau'r Llywodraeth ac sy'n cael eu trafod ar hyn o bryd yn Nhŷ'r Arglwyddi. Mae fy swyddogion yn parhau i weithio'n agos gyda'u cymheiriaid yn Llywodraeth y DU er mwyn sicrhau bod unrhyw ddiwygiadau pellach gan y Llywodraeth yn adlewyrchu blaenoriaethau polisi Gweinidogion Cymru yn llawn.

19. Pa reoliadau yn eich tyb chi fydd yn angenrheidiol wrth weithredu'r diwygiadau o dan y Bil, ac o dan ba bwerau (a gweithdrefnau) yn y Bil? A fydd y rheoliadau hynny a gyflwynir gan Weinidogion Cymru yn gyson ag unrhyw rai a gyflwynir gan Weinidogion Llywodraeth y DU?

Mae Gweinidogion Cymru wedi sicrhau pwerau i wneud rheoliadau sy'n annibynnol ac yn gyfatebol i rai Gweinidogion Llywodraeth y DU ar gyfer mwyafrif helaeth o bwerau perthnasol yn y Bil. Felly, bydd angen i Weinidogion Cymru ddatblygu a gweithredu deddfwriaeth eilaidd mewn perthynas â'r meysydd datganoledig. Mae hyn yn cynnwys rheoliadau sy'n ymdrin â meysydd allweddol a fydd angen cael eu sefydlu er mwyn i'r drefn newydd fod yn weithredol, megis y rhai sy'n ymwneud â'r Drefn Cyffyrddiad Ysgafn, trothwyon ariannol ar gyfer contractau is na'r trothwy, a hysbysiadau caffael.

Mae Cymal 110(10) o'r Mesur Caffael yn rhestru'r pwerau i wneud rheoliadau sydd wedi'u cynnwys yn y deddfwriaeth hon ac sy'n arferadwy gan Weinidogion Cymru ac sy'n ddarostyngedig i'r weithdrefn gadarnhaol. Bydd rheoliadau a wneir o dan unrhyw adran arall (sydd heb eu rhestru yng nghymal 110(10)) yn ddarostyngedig i'r weithdrefn negyddol.

Mae fy swyddogion wrthi'n datblygu cynllun prosiect a fydd yn llywio'r dull o ddatblygu a gweithredu'r deddfwriaeth eilaidd yng Nghymru. Bydd swyddogion yn parhau i gydweithio'n agos gyda llywodraeth y DU ar ddatblygu'r deddfwriaeth eilaidd er mwyn sicrhau cysondeb a chydlyniant wrth weithredu darpariaethau'r Bil, lle bo hynny'n briodol. Bydd dull pragmatig yn cael ei fabwysiadu er mwyn sicrhau bod y Bil yn ateb gofynion Awdurdodau Contractio Cymru yn ogystal â rhai'r cyflenwyr.